



14. august 2009

EM 2009/23

Inatsisartut suleriaasianni § 32 naapertorlugu matumuuna aalajangiiffigisassatut siunnersuummik imaattumik saqqummiussissaanga:

**Qamutit motorillit eqqunneqartarneranni akitsuutit allanngortinneqarnissaat pillugu Inatsisartut aalajangiiffigisassaattut siunnersuut, taamaalillutik qamutit motorillit ikummatissanik atuisuunngitsut akitsuuteqarunnaarsinneqarlutik**

(Inatsisartunut ilaasortaq Niels Thomsen, Demokraatit)

**Tungavilersuut:**

Nunatsinni alianaatsumi avatangiiserput Demokraatit assorsuaq pingaartippaat. Kalaallit Nunaanni uagut nunarsuarmi CO<sub>2</sub>-mik aniatitsinerup kingunerisai erseqqissumik malugaavut. Nunarsuup kissatsikkiartornera nunami tamarmi malunnaateqarpoq. Pitsaasunik pitsaanngitsunilluunniit. Kikkulli tamarmik soorunami isumaqatigissagunarpaat, CO<sub>2</sub>-mik taamatut annertutigisumik aniatitsinermik ingerlatsiinnerneq maannakkut nunarsuarmisut annertutigisoq nunarsuatsinnut peqqinnangitsuusoq.

Demokraatit isumaqarput tamarmiulluta inuiaqatigiit ikummatissanik atuinnerminnik eqqarsaqqullugit kajumissaartariaqarpavut. Taamatut ilisimasaqarneq soorunami CO<sub>2</sub>-mik aniatitsinermik annikillisaaqataasinnaavoq.

Biililiorneq qamutininik assakaasulinnik innaallagissamik, brintimik assigisaannillu atuisunik ineriartortitsinermik ilungersuuteqarnermigut siuarsimalluinnarpoq. Assersuutigalugu ilaqtariit biilii nalinginnaasut innaallagissamik ingerlatillit orsernermi ataatsimi 160 km-it missaanni ingerlasinnaapput, taamatullu nal. akunnerini taamaallaat tallimani orsersoqqissinnaallutik.

Naalackersuinikkut suliaqartut tungaannit biilit benziinatortut dieselitortulluunniit biilininik brintitortunik innaallagissamilluunniit ingerlatilinnik, akitsuutitut politikkip allanngortinneratigut, taarseqqullugit kajumissaarisinnaavugut.

Aningaasaqarnermut Inatsimmi 2009-meersumi erserpoq, ukiumi naatsorsuiffimmi matumani ilimagineqartoq angallatit motori atorlugu ingerlasartut eqqussinermut akitsuutaat Landskarsimut 42 mio. krooninik isertitsissutigineqassasut. Biilit kallerup innera assigisaallu atorlugit ingerlasartut tunisinermi 10-20 %-iuppata, akitsuutininik piigaqarneq Landskarsimut ukiumut 4-8 mio. krooninik naleqassaaq.

Taamaammat Demokraatit tingaanninngaanniit siunnersuutigerusuppara, angallatinik motori atorlugu ingerlasartunik ikummatissanik imerpalasunik atuisuunngitsunik eqqussinermi akitsuutininik ukiumi sisamani misiliutitut atorunnaarsitsisoqarnissaa, soorlu tamanna Danmarkimi aamma misilerarneqarnikuusoq. Danmarkimi biilit kallerup innera atorlugu ingerlasartut 1984-imili nalunaarsorneqarnerannut akitsuutaat peerneqarnikuuvoq (kingusinnerusukkullu aamma oqimaassusaat malillugu akitsuutaat aammalu avatangiisinut mingutserisarneq pillugu

akitsuutaat peerneqarlutik). Akitsuutinik atorunnaarsitseqqagallarnerit 2012-p tungaanut atuukkallassapput.

Pingaartumik illoqarfinni erngup nukinga atorlugu kallerup inneqarfiusuni, avatangiisinut iluaqtissartalipilussuusaaq.

Biilit avatangiisinut ajoqutaanngitsut, ikummatissanik imerpalasunik atuisuunngitsut eqqunneqarneranni akitsuutaat peerneqassappata, Kalaallit Nunaat soorunami nunanit allanit aamma ajunngisaarfigineqarnerulersinnaavoq. Avatangiisit pillugit isumaqatigiissuteqarnissamut nunat pingaarutilerujussuit, Kalaallit Nunaata peqataaffigisariaqagaat.

Neriullunga siunnersuutiga ajunngitsumik tiguneqassasoq Inatsisartunut ingerlateqqippara.